



23. januar 2011
2011/39

UPA

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiupparput:

Nunavummi Nunavimmilu oqartussaasut suleqatiginerisigut inuusuttunut 16-it 30-illu akornanni ukiullinnut "Nuna Job paarlaateqatigiinneq"-mik pilersitsinissaq pillugu Naalackersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartuni ilaasortat Jane Petersen aamma Juliane Henningsen, Inuit Ataqatigiit)

Tungavilersuut

Naalackersuisut Nunavummi Nunavimmillu oqartussaasut suleqatigalugit suleqatigiinnikut pilersaarusoqqullugit Inatsisartut aalajangiiffigisasaattut siunnersuut matumuuna saqqummiupparput. Inuusuttut 16-it 30-illu akornanni ukiullit paarlaateqatigiinnikut allami najugaqarsinnaanissaminnik, kiisalu nunani taakkunani tamani sulisinnaanissaminnut neqeroorfigineqarsinnaanissaat tassani siunertaavoq.

Suleqatigiinnermik pilersaarusionerq aqutigalugu inuusuttut 16-it 30-illu akornanni ukiullit Issittumi nuna alla misigisaqarfigisinnaalissavaat - suliffissaannik, ineqarfissaannik kulturikkullu pikialaartitsinerni peqataanissaannik periarfissinneqassapput, taamatullu inuusuttut inuusuttoqatimit inooriaasiat, oqaasii kulturiallu paasisaqarfigisinnaalissallugu.

Assinganik aqqissuussineq nunani avannarlerni pioreerpoq, Nordjob-imik taaguuserneqarluni. Taanna nunanit avannarlernit tamanit aningaasalersorneqarpoq. Nordjob-imi nunani avannarlerni innuttaasut imminnut ilisarinerulernissaat siunertaralugu aasaaneranani nunami allami imaluunniit nunani namminersorluni ingerlatsiviusuni inuusuttunut 18-it 28-illu akornanni ukiulinnut suliffissanik neqerooruteqartarpoq.

Paarlaateqatigiilluni allami najugaqarallarneq nutaanik paasisassarsionermut ilisimasallu ineriartortinneranni inuusuttunut pingaaruteqarpoq, taamatullu inuusuttunut peqataasunut tamanut inerikkiartornermut sunniuteqarluni. Inuusuttut nunanit assigiinngitsuneersut taamaalillutik imminnut ilisarisarillissapput, akunnerminnilu inuunerup ingerlanerani atorsinnaasaminnik isumassarsioqatigiissinnaallutik. Taamatullu oqaatsinik allanik ilisimasaqalersinnaapput, kulturillu allat paasisaqarfigisinnaallugit. Paarlaateqatigiilluni allami najugaqarallarneq taamaalilluni inaarutaasumik pisinnaatitsumillu ilinniagaqalernissamut alloriarnerusinnaalluarpoq.

Naak nunatsinni ilinniartitaaneq pingaartillugu iliuseqartoqaraluaqisoq malunnarsiartorpoq ilinniartinnut qinnuteqartartut itigartinneqartarnerat annertusiartortoq. Assersuutigalugu ukioq 2010-mi aggustusip qaammataani Piareersarfimmut qinnuteqartut 1.300-upput, inissallu 715-iinnaallutik. Sulilu inuusuttorpasuit ilinniarnertuunngorniartut ilinniartinnut qinnuteqartut, inuutissarsiutinillu tungaviusumik ilinniartinnut qinnuteqartut itigartitaasarput (taakkunani 500-t aamma 250-it). Tamassuma saniatigut ilinniartit tamaasa isigalugit ilinniarnerminnik qimaguttartut 25%-iupput. Pissutsit taamaattut erngumanartuupput, arlaatigullu iliuseqartoqartariaqarpoq.

Taamaattumik nunatsinni inuusuttut arlaqarnerusunik periarfissittariaqarpavut, taamaaliornikkut aamma oqaatsinik atuilluarnerusinnaanissaat, ilinniaqqinnissaminnut inerikkiar-

tornerminnullu annerunerusumik iluaqutigisinnaassammassuk, kiisalu nunatsinni, Nunavummi Nunavimmilu inooriaatsinik kulturimillu qaammaasaqarnerat annertusarneqarsinnaalluni.

Aningaasartuuteqarnikkut allaffissornikkullu Pisortanut kingunerisassai.

Siunnersuut Namminersorlutik Oqartussanut aningaasartuutaassaaq, nunatsinniimmi inuusuttut Nunavummi imaluunnit Nunavimmi paarlaateqatigiinnikkut najugaqarallarsinnaanerminnik periarfissinneqartut angalanissaannut najugaqarallarnissaannullu aningaasartuutissat immikkoortitariaqassammata. Tamassuma saniatigut kaasarfimmiussanut ilinniagaqarnermulluunniit tapiissutit ilimagisariaqarput. Imaassinnaavorli inuusuttoq peqataasoq najugaqarallarnermi suliffittaarallarsinnaasoq, taamaattoqassappallu Nunavummi Nunavimmiluunniit sulisitsisoq aningaasanik isertitaqartitsisuusassaassaaq.

Namminersorlutik Oqartussanulli aningaasartuuteqarnikkut kingunissai ersarissumik oqaatigissallugit sulii siusippallaarpoq, tamannami nunatsinni Naalakkersuisut, Nunavummi Nunavimmilu oqartussaasullu akunnerminni qanoq isumaqatigiissusiorsinnaanissaat aamma suleqatigiinnermik pilersarusiorsinnaanissaat apeqqaalluinnassammata. Taamaaliornikkulli nunatsinni inuusuttut periarfissinneqassapput, taamatullu oqaatsinik allanik ilisimasaqarnerat pillugu siuarsaaniartoqarluni ingerlanerminnilu ilinniagaqalersinnaanissaminnut inerikkiartortinniarneqassallutik. Taamatut aqqissuussinerup immikkoortuisa ilaat Ilinniartitaanermut pilersaarummut kiisalu ilinniartitaanerup immikkut ittumik suliniuteqarfigineqarnissaa siunertaralugu aningaasaliissutinit matussuserneqarsinnaasoq periarfissatsialattut isigisariaqarpoq.

Aningaasartuuteqarnikkut allaffissornikkullu namminersorlutik inuutissarsiuteqartunut kingunerisassai.

Siunnersuut taamatut isikkoqartillugu namminersorlutik inuutissarsiuteqartunut aningaasartuuteqarnikkut allaffissornikkullu sunniuteqartussaangilaq.

Aningaasarsiorinnikkut allaaffissornikkullu innuttaasunut kingunerisassai.

Siunnersuut innuttaasunut aningaasartuuteqarnikkut allaffissornikkullu toqqaannartumik kinguneqartussaangilaq, parlattuanilli inuusuttunut annertunerusumik ilinniagaqarusuttunut inaarutaasumik piginnaasaqarfinniffiusumillu ilinniagaqalinnginnermi inerikkiartorusuttunut nutaanik periarfissiissaaq.